



ATASSUT
Steen Lyngé

UPA2015/123
13.05.2015

Allaffissornikkut ingerlatsiviup atugarisai aaqqissugaaneralu pillugit apeqquteqaat aallaavigalugu oqallisissiamik siunnersuut. Ullumikkut pisorta qarfeqarnikkut aaqqissugaanerput nukissanik atuiffiulluarlunilu inuiaqatigiit angissusaannut kulturiannullu naleqqussagaava.

(Inatsisartunut ilaasortaq Naaja H. Nathanielsen, Inuit Ataqatigiit)

Atassut-miit Naaja Nathanielsenip IAmeersup aqutsinerup allaffissornikkullu atugarisai aaqqissuusaanerallu pillugit apeqquteqaat aallaavigalugu oqallisutissatut siunnersuutaanut Atassut imaattunik oqaasertaliiumavoq.

Tunngaviatigut innuttaasugut isumaqartarpugut pisortat ingerlataat pilersinneqarsimasut taamaallaat innutaasunik inuussutissarsiuteqartunillu sullissinissaq ikorfartuinissarlu siunertaralugit. Saniatigullu kissaatigineqarpoq pisortat ingerlatsinerat innuttaasunut inuussutissarsiuteqartunullu akornuusersuisuussangitsoq.

Aammalu qanorluunniit pisortat ingerlataat ingerlatsinerallu pillugit oqallisileraangatta, taava tamanna innuttaasunit inuussutissarsiuteqartunillu tamatigunqajak isorineqarlunilu naalleraasutut nalilerneqartarpoq. Naammagittaalliornerillu nalinginnaasumik nassuiaaserneqartarput, tassagoq ingerlatseriaatsit qallunaat nunaanni ingerlanneqartunut assingusut tiguinnarnikuugatsigit.

Aqutsineq ingerlatseriaatsillu oqallisatillugit pingaartuuvoq eqqamassallugu Inatsisartut tassaammata inatsisiliortut innuttaasunut inuussutissarsiornermillu ingerlataqartunut tunngavissanik sinaakkusiortuusut, sinaakkusiallu taakku iluini ipput inuiaqatigiinni piginnaatitaaffiit pisussaaffiillu. Sinaakkusiat taaneqartutut ittut aqussinnaajumallugit allaffissorfinnik pisorta qarfeqarpugut taaneqartut iluini “ilaajaasartussanik”



ATASSUT INATSIARTUNI

Qaqugukkulluunniit immitsinnut aperisinnaavugut ingerlatseriaatsimik qeratavallaartumik pilersitsisimanerluta innuttaasunut inuussutissarsiornermillu aallutaqartunut piumasaaqatitaqarpallaartunik.

Killormulli aamma immitsinnut aperisinnaavugut, aqutsinerup iluani sulisussanik ikippallaartunik immikkortorta qarfinnullu mikivallaartunik taamallu naammattumik innuttaasut inuussutissarsiuteqartullu sullinerini akisussaaffimminnik naammaginartumik malinnaasinnaangitsunik pilersitsisimanerluta. Inatsisartuni issiasugut apeqqutinik taamatut ittunik immitsinnut aperisariaqtut iliornissaq aqutsinerup iluani pineqartumut naleqqutinngitsumik aningaasartuuteqartitsilissasoq.

Atassut-miit pingaartutut aallaaviuvoq aqutsinerut atatillugu allaffissuaqarnerup angissusiata imatut innissaa imatullu piginnaaneqartuunissaa, ingerlanneqassalluni aqutsineq innuttaasunut tamanut tunngavimmigut piginnaatitaaffiusut eqqarsaatigalugit illersorneqarsinnaasumik sullissisinnaasoq taamallu aamma allaffissornikkut aqutsinikkullu inuussutissarsiornermik namminersorlutik ingerlataqartuusut pitsanerpaamik sinaakutissaqartinneqarnissaat isumagisinnaallugu..

Allaffeqarfiup angissusia qaqugukkulluunniit ima piginnaaneqassaaq innuttaasut namminersorlutillu inuussutissarsiuteqartuusut kikkut tamat oqartussaaqataanerisa anersaava malillugu piginnaatitaaffeqarnerat qularnaatsumik inissisimatinneqassalluni.

Taamatut oqaaseqarluta soqutiginarumik oqallissaaruteqarnermut qujavugut.

